

211

# Zu finden yn welcher mansion der Monde teglich erfunden werde.



**S**uche ynn den gemeynen ierlichen laszeteln den tag / daran du wissen wilt die mansion des Monnds / vnd zur rechten hand findestu das zeichen vnd grade des Monnds des selbigen tages. Solchs zeichen vnd grade des Monnds / suche darnach ynn diesem nachfolgenden Teselein der mansion ynn den zeichen vnd graden des anfangs vnd endes solcher mansion / vnd so du solchs zeichen vnd grade des Monnds alda findest / so ist er yn solcher mansion / solchem grade gleichstehende gegen der lincken hand / vnd solcher mansion natur zur rechten solchs grads. Ein exempel.

Ich setze der Mond sey ynn .6. grade vnd .35. minuten des Krebs / solchs zeichen / grad vnd minuten finde ich ynn der ordnung anfangs der mansion / vnd zur lincken hand / sieben / das ist / das der Monde ynn der siebenden mansion sey / solcher mansion natur zur rechten hand / ist feuchte / So aber solchs zeichens grade des Monnds ynn solcher Tafel nicht verzeichnet were / so mercke wo solcher grade beschloffen werde / zwiffchen dem anfang vnd ende der mansion / denn ynn solcher zeile mansion ist denn der Mond. Ein exempel. Anno 1528. am. 29. tage Martij / ist der Mond ynn achten grade des Lawen / Solcher .8. grade des Lawen / wird beschloffen zwiffchen dem .2. grade vnd .17. minut. dem anfang / vnd .15. grade .9. minuten dem ende der neunten mansion / Darumb sage ich / das denn auff solchen .29. tag der Monde sey ynn der neunten mansion / welcher natur vnd eygenschaft trucken ist. Diese mansiones zu wissen / sind fast dienstlich zu viel dingen / vnd sonderlich zu ertzneyen / wie denn solchs darbey angezeigt wird.

A iij Tafel